



Projek KNAL Tanah Abang bakal lahirkan usahawan muda B40

BERNAMA

MERSING, 10 Feb -- Projek Kluster Nanas Lestari (KNAL) Tanah Abang, di sini, bakal melahirkan usahawan muda golongan B40 sekali gus meningkatkan penglibatan usahawan kontrak dalam bidang pengeluaran nanas secara komersial.

Pengerusi Lembaga Perindustrian Nanas Malaysia (LPNM) Datuk Abdul Malik Abul Kassim berkata projek inisiatif LPNM itu merupakan usaha menyusun kawasan penanaman nanas secara berpusat dengan membangunkan tanaman nanas jenis MD2 menerusi pengurusan cekap, berkesan dan mampan.

Beliau berkata projek yang dijalankan di tanah seluas 121.5 hektar dengan menempatkan 12 peserta dalam kalangan B40 itu melibatkan kawasan penanaman nanas seluas 48.5 hektar dan merupakan projek LPNM secara usaha sama dengan Johor Corporation (JCorp), Kulim Malaysia Berhad, Agrobank dan Unit Agropreneur Muda MOA.

"Antara objektif utama projek KNAL adalah untuk mewujudkan zon atau kluster tanaman nanas secara kekal, meningkatkan pengeluaran tanaman agromakan, meningkatkan pendapatan peserta terlibat sekurang-kurangnya RM5,000 sebulan serta menggalakkan penglibatan sektor swasta dalam industri nanas negara," katanya berucap pada majlis perasmian projek KNAL Tanah Abang, di sini, pada Sabtu lepas.

Majlis perasmian disempurnakan Menteri Pertanian dan Industri Asas Tani Datuk Seri Salahuddin Ayub.

Abdul Malik berkata berdasarkan pengalaman luas dalam sektor perladangan nanas, Kulim Pineapple Farm (KPF) iaitu anak syarikat Kulim (Malaysia) Berhad telah dilantik oleh LPNM sebagai 'syarikat utama' dalam mengurus, membangun dan memajukan ladang berkenaan secara komersial.

Menurutnya, kesemua peserta yang dipilih diperuntukkan keluasan maksimum tanah seluas empat hektar seorang secara berfasa dan dibekalkan bantuan benih nanas MD2 sebanyak 200,000 pokok.

"Untuk fasa pertama, mereka (peserta) diberikan 100,000 benih terlebih dahulu bagi keluasan lima ekar 9 dua hektar). Peserta juga diberi bantuan geran daripada Unit Agropreneur Muda MOA dengan nilai RM20,000 seorang melibatkan pembekalan input pertanian dan peralatan," katanya.

Abdul Malik berkata Agrobank selaku pihak pembiayaan turut menyuntik modal sebanyak RM50,000 seorang bagi pembangunan ladang yang kesemuanya diletakkan di bawah pengurusan KPF.